

四庫全書

史部

欽定四庫全書

四明續志卷六

宋梅應發劉錫同撰

三郡隘船

明為左馮翊而州瀕於海鱷波吐吞渺無津涯商舶之
往來於日本高麗蕃舟之出沒於山東淮北撐表拓
裏此為重鎮嘉熙間制置使司調明溫台三郡民船
防定海戍淮東京口歲以為常而船之在籍者垂二

十年或為風濤所壞或為盜賊所得名存實亡每按籍科調吏並緣不卹有無民苦之寶祐五年七月大使丞相吳公慨然曰人心固則天險固根本動搖奚恃無恐乃立為義船法白于朝下之三郡令所部縣邑各選鄉之有材力者以主團結如一都歲調三舟而有舟者五六十家則衆辦六舟半以應命半以自食其利有餘貲俾蓄以備來歲用凡丈尺有則印烙有文調用有時井然著為成式且添置幹辦公事三

員分洫其事三郡之民無科抑不均之害忻然以從
船自一丈以上共三千八百三十三隻以下一萬五
千四百五十四隻入下而不堪充軍需者或謂飄忽
去來於滄溟汗漫之中呼儔嘯侶亦得以貽吾憂併
為之印籍陰寓防閑公先事而慮銷患未形至是無
遺筭矣

省劄

本司自嘉熙年間準朝廷指揮團結溫台慶元三郡民

船數千隻分為十番歲起船三百餘隻前來定海把隘及分撥前去淮東鎮江戍守夫以百姓營生之舟而拘之使從征役已非人情之所樂使行之以公加以不擾則民猶未為大害柰何所在邑宰非貪即昏受成吏手各縣有所謂海船案者恣行賣弄其家地富厚真有巨艘者非以賂囑胥吏隱免則假借形勢之家拘占惟貧而無力者則被科調其二十年前已籍之船或以遭風而損失或以被盜而陷沒或以

無力修葺而低沉或以全身老朽而弊壞徃徃不與
銷籍歲歲追呼以致典田賣產貨妻鬻子以應官司
之命甚則弃捐鄉井而逃自經溝瀆而死其無賴者
則流為海寇每歲遇夏初則海船案已行檢舉不論
大船小船有船無船並行根括一次文移遍於村落
乞取竭於雞犬環三郡二千里之海隅民不堪命
日不聊生待至起到舟隻則大抵舊弊破漏不及丈
尺貢具則踈略稍火則脆弱亦姑以具文塞責而已

民被實擾官虧實用且天險之防以人心為本而先使百姓憔悴根本動搖脫有緩急何恃而亡恐臣已結為義船法謂如一都每歲合發三舟而有船者五十家則令五六十家自以事力厚薄辦船六隻船身必堅耐貢具必齊整梢火必強壯歲發三舟而以三舟在家營生一歲所得之息則以充次年修船辦貢具招梢火之用立以程限守以信必每歲遇當把隘之日則如期駕發以至軍港聽候調遣於是有船

者無倖免之理無船者無科抑之患永絕姦胥猾吏
賣弄乞覓之苦永銷濱海居民破家蕩產之憂人心
固則天險固三郡邊海之人莫不欣然聽從行將就
緒實為海道無窮之利朝廷照得義船結約若果民
戶樂從則速與行下但船久則有損弊民戶它日寧
無貧富不齊須與入細立為經久不廢之規使官司
民戶兩便方可行聖旨依劄送沿海制置大使司關
牒施行

慶元府六縣共管船七千九百一十六隻

一丈以上一千七百二十八隻

一丈以下六千一百八十八隻

鄞縣六百二十四隻

一丈以上一百四十隻

一丈以下四百八十四隻

定海縣一千一百九十一隻

一丈以上三百八十七隻

一丈以下八百單四隻

象山縣七百九十六隻

一丈以上一百二十八隻

一丈以下六百六十八隻

奉化縣一千六百九十九隻

一丈以上四百一十一隻

一丈以下一千二百八十八隻

慈溪縣二百八十二隻

一丈以上六十五隻

一丈以下二百一十七隻

昌國縣三千三百二十四隻

一丈以上五百九十七隻

一丈以下二千七百二十七隻

溫州四縣共管船五千八十三隻

一丈以上一千九十九隻

一丈以下三千九百八十四隻

永嘉縣一千六百單六隻

一丈以上二百五十九隻

一丈以下一千三百四十七隻

平陽縣八百單九隻

一丈以上三百隻

一丈以下五百單九隻

樂清縣一千六百八十六隻

一丈以上三百七十一隻

一丈以下一千三百一十五隻

瑞安縣九百八十二隻

一丈以上一百六十九隻

一丈以下八百一十三隻

台州三縣共管船六千二百八十八隻

一丈以上一千單六隻

一丈以下五千二百八十二隻

寧海縣二千八百單九隻

一丈以上二百八十八隻

一丈以下二千五百二十一隻

臨海縣一千九百七十四隻

一丈以上五百五十二隻

一丈以下一千四百二十二隻

黃巖縣一千五百單五隻

一丈以上一百六十六隻

一丈以下一千三百三十九隻

出戍

祖宗時內而三衙外而諸指揮皆禁旅也南渡初新置江上諸都統內不充三衙之數外不損諸指揮之額於是禁軍之在諸郡養養驕侈坐縻厚稍而三衙乃間有出戍者大使丞相吳公深病之故凡出鎮藩閫每欲昭明此意及制置沿海三年無日不申倣之至寶祐六年密院調遣之初諸郡至有相顧睥眄者獨慶元曾不移時如漢合節翕然報應了無稽違迨其

還歸終始就律遂為諸郡之冠蓋公信義素著恩威兼行固有不疾而速不行而至者于今邊戍未撤甲兵之問日至廟堂是不可不詳紀以詔來者

寶祐六年八月準密劄節文勘會近京湖沿江副制司之兵節次遣調戍廣戍蜀戍沅靖動數萬計竊恐沿江防守單弱權宜於內地禁軍量摘內慶元府選揀五百人時內郡紀綱積弛尺籍積驕弓矢干戈積廢不治獨慶元自大使丞相吳公開藩以來撫御閱習

紀律素嚴淬礪繕修器甲素備命下不兩日點集遣
發軍容整肅命計議洪易簡部之自越而昇見者莫
不起色若軍裝則隊身衣甲五百副紅布衲襖五百
領皮束帶五百條抓角頭巾五百頂雨傘五百柄韜
鞋五百韞若軍器則滴油箭一萬二千隻長鎗一百
二十八條腰刀一百七十柄弩二百枝腰斧三百柄
短鎗三十條麻札刀一十柄箭葫蘆一百二十筒油
絹弩袋一百二十箇小陣鼓一十二面鑼四面梆子

四條若旗幟則慶元府將兵旗一面轉光旗三十面
長鎗旗一百八十面攔前後旗二面擁隊押隊旗二
十四面額外管押訓練肅靜旗三面令牌二面隊教
頭旗一十面若火隊器具則鐵鍋六口水桶一十二
隻羹桶一十二隻飯籬一十二隻飯升六隻爪籬木
杓一十二副飯栲栳二百九十八箇撈米箕二十隻
鋤頭一十二柄鋤一十二柄盛米布袋四十隻匾擔
六十條麻彈索四十條此役也總轄官劉永撓三百

貫攔前後將官二員各一百貫本部將官二員每員
各八十貫撥發訓練官五員每員各七十貫合千人
七十七人每名各六十貫隊身官兵四百二十七名
各五十貫外科軍醫一名一百貫方脉醫人一百貫
扛令牌軍兵四名白直二名每名各二十貫帶行白
直一十二名每名各一十五貫遣發次再奉鈞旨出
戍軍兵恐或病患支二千貫專充收贖藥餌續又發一千貫
費赴差雇烏頭船二十隻乘載官兵衣甲軍器錢糧
戍所

等物至西興每隻照例支雇錢一百五十貫共三千貫又自北關門雇大航船二十隻至鎮江府每隻照例支雇錢五百貫共一萬貫其間出戍死亡之人奉鈞判各家優支家糧五月併給春衣更支一百貫追薦津送續戍兵已滿一季又復存留再奉鈞旨等第支犒共官會一萬三千九百三十五貫賫赴戍所至仲冬嚴寒大使丞相深念采薇之戍必動鄉蓐之思專差將校賫官會五千五百四十五貫江蠶一千四

十九箇郎君魚五百六十五斤石首鯊五百六十五斤分犒戍所官兵總轄官劉永三百貫部轄將佐二員各五十貫江蠶二箇半石首鯊二斤郎君魚二斤撥發官一員一十五貫江蠶二箇半石首鯊二斤郎君魚二斤訓練官一十員各一十五貫江蠶二箇半石首鯊二斤郎君魚二斤押擁隊壕塞官至諸項職掌人共三十九名各一十三貫江蠶二箇半石首鯊二斤郎君魚二斤官兵四百五十九人各一十貫江

蠶二箇石首鮓一斤郎君魚一斤職醫二人兩相交
替共三貫江蠶一箇石首鮓二斤郎君魚二斤兵士
激烈恩遇以至感泣蓋說以使之忘其死矣開慶元
年四月二十日劉永自鄴回戍犒一千貫酒一十瓶
副部官董偉犒一百貫酒四瓶撥發壕寨司屬訓練
官擁押隊四十人各犒六十貫酒六升錢糧火隊司
押教諸色教頭二十三人各犒五十貫酒五升隊教
頭旗頭隊司五十人各犒四十五貫酒三升隊身官

兵三百八十二人各支四十貫酒二升共計支錢二萬三千六百八十貫酒四百三十七瓶

水閱

舟師東南長技自紹興二年沿海置司以來蒐練之術甚疎然用之懾伏海盜尚足為當道之老熊也淳祐間始遣戍上流而兵備分於是委樓櫓艘艘廢而不理而主兵者方日以掊剋苞苴為事大使丞相加意團結瀕海諸郡既藉以增壯遂於三江合兵民船共

閱之蛟龍在淵網罟不施東盡遼海一目無際公之意遠矣

寶祐六年十月十二日奉大使判府大觀文丞相樞使國公批牌釣判朝廷日嚴海道之防但調遣兵船猶不暇給內地豈容空虛又準朝旨一面團結溫台明越巨舟以助官司之所不及今差人抄劄到自來商販上戶之家出等大船二十二隻送專行司只今差官拘點每船以五十人為率每名本府月支錢五十

貫米一石二斗上項船專留江下不時輪番下海巡
連以鎮壓鼠狗之盜限一日條具合行事件申未及
奉行而船戶莫不響應各以保護鄉井為心競出大
舟分泊府岸於是得大料船共二十四隻分為兩部
又招募到駕船水手一千二百人給口券養之自十
月朔為始至明年三月晦終焉首尾五月總支錢二
十五萬貫文自團結以至放散其間不時激犒約十
萬貫共用錢三十五萬貫文米六千石其錢本司自

行撙節措辦惟米無所從出竊考前權郡余通判元
借朝廷義倉米七千石見行拘監填補遂申尚書省
乞就以此米應副水手支用十月二十九日三省同
奉聖旨特依遂差本司計議官洪易簡充提督帳前
水軍統領充錢糧官并各支撥官錢鼎造軍器旗號
及水手軍裝亦用錢十餘萬緡繼檄定海統制邢子
政選駕軍船一十隻並赴府港赤馬白鷁在焉以十
二月三日大使丞相就下卸門外江館按眎教閱先

一日雨徹旦翌曉晴霽迨午風起雲揚潮勢增壯舟
船上下旗幟精明砲擊檣衝觀者如堵以為自有沿
海制司所未見也復就委邢統制統率上項軍民船
於次日出海上至澈浦下至神前石衙迤邐出放大
洋巡遶至二十三日自海回府仍擺府岸環海聞之肅
懾已申密院照會續以邊報未靖至四月中方行放
散水手頭目以下等第支犒約三萬緡其民船二十
三隻並令從便惟王紹祖一船面濶三丈五尺元係

獻助防海嘗申朝廷奉省劄行下拘樁本司聽候聖
旨差撥

作院

除戎器戒不虞聚而有防也大使丞相吳公既建武藏
以藏兵敕乃甲冑敵乃干無敢不弔遂以慶元府甲
伏庫帳前庫應管軍器並改隸制置大使司院十有
三作曰大爐作曰小爐作曰穿聯作曰磨鋸作曰磨
擦結裹作曰頭魁作曰熟皮作曰頭魁衣子作曰弓

弩作曰箭作曰漆作曰木弩椿作曰木鎗作曰役軍
民匠人軍匠日支錢三百文米二升酒一升民匠一
貫五百文諸軍子弟匠五百文米酒視軍匠之數以
民匠勞逸不均則下定海奉化鄞縣照籍輪差每四
十日一替起程錢各五貫回程十貫繇是人皆樂赴
其役軍需物料官給直無取於民院有受給庫而又
有子庫以受日造之物凡創造到諸色軍器衣裝等
物總十一萬九千五百件繕修者不與焉鶴膝犀渠

武庫森列蓋百年之所未見孟明之言曰鄭有備矣
其斯之謂與訓工程作於寶祐六年之十月迄開慶
元年五月支過錢

鐵甲頭魁披膊壹阡伍伯單肆副

紅槍叁阡陸伯叁拾柒條

紅衲襖并腿裙壹阡副計貳阡件

黃布衫玖伯領

黃布軟纏伍伯肆拾伍領

紅布衫柒伯肆拾貳領

皮條壹阡壹伯陸拾肆條

頭巾伍百單伍枚

吞項壹伯肆拾肆箇

雜色旗幟陸伯捌拾捌面

朱紅笠頭伍伯肆拾玖頂

黑漆筋角弩壹伯枝弦索全

黑漆筋角弓貳伯張弓絲弦壹伯條

木弓壹伯張并弦

木弩叁伯枝弦索全

弓箭叁阡隻

白皮箭數伍伯玖拾伍箇

滴油箭貳萬壹阡叁伯隻

滴油箭孟肆伯捌拾玖箇

遮箭牌叁拾面

雜色义肆伯貳拾管

雜色鎗壹伯柒拾柒條

梭木棒叁伯肆拾叁條

刀鞘捌伯捌拾玖箇

弩椿肆伯貳拾壹口

腰刀壹阡肆伯叁拾玖柄

斧頭肆伯伍拾貳柄

雜色弓箭箭頭柒萬伍阡陸伯伍拾隻

划車弩椿伍拾捌口

木槍桿叁伯肆拾玖條

鎗鑽頭壹伯捌拾貳管

戰鼓壹拾肆面

陣鼓貳拾面

鑼壹拾肆面

皮馬甲壹副

黑漆光羹桶伍拾副

紅油水桶伍拾隻

紅油吊水桶貳拾伍隻

鐵鍋伍拾口

紅油飯簍伍拾隻

米斗貳拾隻

米升貳拾隻

飯升篋貳拾隻

瓜籬叁拾箇

船艚壹拾伍條

雨傘壹佰肆拾伍頂

隔箭布條肆片

武藏

武藏即甲仗庫也先是置於設廳前三廡之閣上下眎
為文具歷三十年無一器一甲之增暇日閱之矢無
鏃鎗無鏃鼠穴蟲蠹積塵幾尺蓋作院之政不修修
悠汨汨狃於宴安其號為脩治者又不過困於科斂
兵食諉其水軍而已大使丞相九開藩閫所至繕甲

治兵其來鄣也日討而申倣之未幾所積既富日贍月衍遂度地酒庫之北教場之南東阻郡圃西抵子城為樓屋二十四間大門七間隨廊十間並棧之以閣櫺窗疎明半板半簾風日迥透而蒸醖不侵分為六庫庫各有目榜之曰武藏藏之為言藏也蓋公以文事必有武備又不欲暴之羣目睽睽之所故欲人不得其門而入而藏諸此且世之玩愒時日懵不知修車馬脩器械者固不足道至有經意於此者率皆

表褻夸詡眎古人藏武不用者則又有逕庭公之備也豫而公之藏也密吁旨哉武藏大扁乃公所自題而所藏兵器舊既無管今具載作院新造之目云

小教場

小教場舊志書射亭在九經堂後而限桃源洞於北每習射無以遏憧憧往來開慶改元春庶政咸理乃遷舊圃於府堂後而取蒼雲堂之北為小教場然後自府堂而郡圃自郡圃而教場各適其便教場門不易

舊而取徑以達則大人堂門在徑之東新桃源門在
徑之西自大人堂接閱武廳為屋十三間以處士卒
而前為廊廡名類箭所教場之內東為閱武廳三間
軒峙其下後居以室屏刻師卦西為霸王臺前棲鵠
馬武藏之門實居其南教場東西相距五十五丈墻
高一丈九尺視舊觀開廣明敞矣時帳前多江淮將
校步驟其中意若矜壯焉

帳前撥發壕寨官舍

撥發以授師律壕寨以飭頓舍所在制府必先之蓋所以重元戎也沿海設垣左馮承平時議不及兵凡軍政皆相安簡陋而已大使丞相建閫以來中權振厲武備修明部曲秩然分隸戲下迺即儀門外之東西創添撥發壕寨以次官舍十有八間凡器具無一不備於是油幢氣象益嚴肅焉

東廊

都撥發官房五間軒屋一間

撥發官房一間

撥發司房一間

押教房一間

教頭房一間

金鼓教頭房一間

雜職房一間

西廊

都壕寨官房三間軒屋一間

壕寨房一間

壕寨司一間

制司將佐房一間

局兵房一間

四明續志卷六

欽定四庫全書

四明續志卷七

宋梅應發劉錫同撰

排役

差役法肇於唐武德本朝因之以九等定役上四等則充下五等則免祖宗優恤下戶之意槩可見矣自義役創於處之松陽天下多倣行之初意甚善歲久弊滋富民因以售利已害人之好此朱文公四弊之奏

亦歸之役首收田租排名次之不公也大使丞相吳公入相出藩凡田間利病民情隱微不啻燭照龜卜判慶元之明年目擊六邑義役之弊其間有使細民執充一日半日而田連阡陌者反得免公謂非祖宗意昭揭曉示分委僚屬覈物力之高下定征役之遠近或置莊率田或裒金鳩穀或雇募代役或隨月輪充一界七年周而復始守之堅如金石行之信如四時富者不得以不義害弱者遂為邦民悠久無窮之

利役籍藏於郡邑詳且明此不復書

行移始末

寶祐五年十二月初三日奉鈞判照對國家差役之法
最為明備緣世降俗末人情姦狡詭計橫生於是義
役之說興焉本所以救差役之弊不知義役乃所以
大不義細民受害更重於差役此天下之通患而其
患未有甚於慶元者大抵義役必有役首非各甲上
戶不能主役柰何只知利己更不恤人謂如一甲之

中有上戶二十家律以正差役法及倍法自合輪流充應却與此二十家結為一黨派及下戶有勒充一月者半月者十日者甚至有三日一日半日八分四分者不知出何條令縣官惟胥吏之聽胥吏惟上戶之聽私立甲簿視同官司文書小民只得俛首聽命間有經官陳訴者則上戶率錢賄吏吏頤指縣官或訊或杖或監廊或繫獄必使下民依應而後已不幸適有殺傷煙火盜賊及一切不測追捕之事役首又

操縱其間隨役戶之囑託事在昨日或移在今日事
在上半日或移在下半日使當役細民應辦官司支
吾巡尉數畝之田不了貨賣結拆數口之家不了拋
離分散官吏肥上戶肥而細民則日就窮困滅絕其
強壯則流而為盜賊故所謂義役者特專為上戶躡
避差使之地而已不義孰甚焉且官司與上戶所恃
者民耳民困則上戶亦豈能自立官司亦豈能自存
胥吏正猶豺狼只欲藉此吞噬固難責辦如上戶多

是衣冠讀書赴舉仕族亦但知目前我有田園我有
貲財可以計會胥吏可以囑託官員細民何異螻蟻
不妨儘儘欺凌實是不曾思量到底若見本府開說
許多道理亦必省悟今本府痛察細民之苦合與扶
持一番應民役義役各縣委官重與整頓各仰先備
榜曉示如民戶無詞即仍其舊如有不公不平去處
即照本府約束將鄉司寄收縣獄責決配截手罪狀
從公開具各都各甲的實當充上戶凡民役義役各

與排定七年自新年為始上戶照條充應一年其以
次人戶許兩戶或三戶共充一年庶使七年之間細
民得以安居田里安養生息其於國家根本關係不
小各縣風土事宜本府亦有未能盡知者仰條具甲
聞務歸於當以便百姓仍委各縣知縣提督并備榜
府前市曹各縣曉示續改委專官下縣置局排結諸
鄉各都攢造籍冊每都三本取押用印一留府一留
縣一留都以七年為一界役冊則委司法廳掌之

樓店務地

紹興經界內該載樓店務地計二萬九千九百三十丈
二赤五寸及分等則令略具如后

第一等地

上則東安鄉自府前街兩岸取四明橋自能仁寺
前市廊西街北岸至貫前巷口自貫前巷口市
廊南北岸止永濟橋

上則武康鄉自能仁寺巷口市廊取東渡門南北

岸及自稅務橋阿滿門首取鰲團內歸西止團
橋林保門前住井靈橋門直取宋端仁舊食店
今施崇住及自車橋北巷口入兩岸取鄭允客
店今吳獻可住

中則東安鄉自貫前南西兩岸取市心橋自南湖
頭西取舊酒務橋自四明橋南取行衙前至君
奢橋并舊瓦子內自永濟西街南北兩岸直取
朝京門住

中則武康鄉自貫橋南東岸一帶直取市心橋復
回東向南北兩岸至廣惠寺橋曹承富門前住
對南岸是周孚門首并自縣南街東西兩岸至
大梁街巷口西岸係史武翼賃屋門前東岸街
止天慶觀橋及自丘家橋北至車橋南趙漳門
前并自宋端仁舊食店門前取新排橋

下則東安鄉自君奢橋南取倉橋自甬水門取威
果營前細湖頭至奉化橋自花行至飯行五通

巷新瓦子自太保衙前寶雲寺前至新排橋自
貫前巷北法場東西岸至能仁寺西巷以王彥
升門前直至寺前西岸西至東僉判衙前廟住
下則武康鄉自貫橋取東河下南北兩岸直至鹽
蛤橋曲轉取鹹塘街東西兩岸東至吳獻可客
店元係鄭允屋并自蕭家橋南街東西兩岸直
取廣惠橋下曹承富門前復轉曲西取縣學前
南北兩岸至巷林岳賃屋及林家小巷縣西河

下并自新排橋東取景福巷口

第二等地

上則東安鄉自奉化橋北西岸至市心橋自舊酒
務西曲取天寧寺橋自添差僉判廳鑒街西岸
至鑒橋自渡母橋東岸北巷沿河東西兩岸直
至廣仁巷口南岸住

上則武康鄉自後團翁仲門前歸東取南直至市
舶司後橋住并自清水碇西取蓋家橋曲北兩

岸至鹽蛤橋西岸河下住油車巷及自市廊能
仁寺巷陳康時門前東岸取北曲東西兩岸直
衝魏家巷肚并自市心橋南取新橋南王居隱
賃屋及自塔下橋方安仁門前大梁街巷口方
安仁賃屋

中則東安鄉自四明橋下取竹行河下至章耆巷
口曾家匯一帶自蔣家帶取福明橋及倉橋頭
自永濟橋西岸北沿河下東西兩岸直至東上

橋自河利橋西岸北街兩岸至方家橋自天寧寺後巷南北兩岸方家橋至李明橋住

中則武康鄉自廣惠橋南戴述門前取東西兩岸直至天慶觀前止棺材巷并自廣惠寺後橋蔡涇門前入小梁巷兩岸至邊太丞屋後住及自陸博橋取東北兩岸至新河頭小洞橋住并隱仙橋下及天慶觀後街取紀銳香店後住孔家巷口牢城營巷內許家小屋并新橋南楊從政

賃屋前取樓宗博宅前并取塔下西岸黃卿賃屋及泥橋下取新河頭戚新門前住

下則東安鄉自章耆巷醋坊巷新橋南河下褚家巷自西岸至甬水門裏河下北岸直取河一帶止四明嶺後自舊酒務西南街取保聖橋自廣福巷取不隸將營後取君奢橋能仁寺前巷東取西曲北取阮家橋并添差僉判廳後巷方家橋至西上橋孝文巷直至西河頭南北兩岸虹

橋五通巷東西兩岸取壯城營王通判宅前周
真家後天寧寺橋下南岸沿河取王參政府後
曲南取州社壇并朝京水門

下則武康鄉自姚家巷穿菴廟巷并自新橋南蔣
璉解宇屋頭小巷屋底及自新橋南西壽昌巷
入王中大解宇屋自福明橋下直取樓宗博宅
後巷自祥符寺前取景福寺鄞江門止丘家橋
自戚喜門前止南寺後門周信門前自車橋下

北取楊安常庫前小橋下巷取全捷營前

第三等地

上則東安鄉自福明橋西取普照院巷至戒香寺
縣社壇自保聖橋取湖橋頭自韓家橋裏鑄冶
巷勞家橋自小頭湖取水月橋自鑒橋東巷口
取石碛頭毛慶家住自鑒橋西至桃源洞後并
州學西西河頭林迪功宅西四家元係第二等
下則無出入路降入此等

上則武康鄉自魏家巷口入本巷西岸至巷底祝
昉門前往自洗馬橋東取北雙營前橋下取新
寺後門巷口直取西巷口自北八營前入缸井
巷止南寺後門河頭轉取張童巷

中則東安鄉自崇教寺巷一帶鑒橋北巷并州學
河東岸直至鹽倉橋能仁寺東巷街西岸直至
石碼頭橋槐陰巷并河岸土地橋石版巷西曲
取興聖院東小路及曲取孝文巷取白塔巷西

曲南至西河頭兩岸

中則武康鄉自後市邊家客店前西取縣後至石
礪姚振門前取南至能仁寺巷東住廊頭草營
巷自景清寺前東取興教寺巷口西取景德寺
後街巷口轉取小巷魏璿門前北取泥橋下自
波斯圍止酒務營前轉取丘家橋直取石版巷
取白塔下朱惠屋後取程房門前取郁家巷

下則東安鄉自保聖寺西河下取王參政府西取

州社壇自聖功寺前取橋頭西畔取袁登仕宅
前自鹽倉門西取達信門轉取雄節營前曲取
教場東巷至州後匯頭自白塔巷西巷口北岸
取鄭堰門頭東取舊法場威勝營前取東村富
家後自杠橋北岸巷曲西小五通巷曲取應家
巷宜秋巷自興聖院東并院于後沿墻下直取
鄭堰門頭

下則武康鄉自陸家巷夏家巷張秀才巷并獅子

橋取秋家巷後周信屋後轉取奉聖院前曲取
開元寺後

末則東安鄉自觀音寺前取鮑知府宅前自甬東
門墻下延慶寺前自達信門裏西沿墻取北郭
舊法場自大教場後至此墻下自興聖院前福
田院直取應家巷宜秋巷頭毛慶家至蜃池頭
曲取鹽倉橋

末則武康鄉自石碛頭取蜃池頭資聖院園地曲

東小路官城脚下自陰溝巷入取范珍屋後自延慶寺水月橋南河城下取東曲轉北

寶祐六年十二月有告于郡者以為本府樓店務地自來有租賃官司地段全不納官錢而私以轉賃於人白收賃錢者有止納些少賃錢而影射者有十餘丈地而歲納官錢不能十數文者有坐據要鬧之地三數十丈而分文不納者有連薨接棟跨巷涉里號為府第之地而不敢過而問者遂使貧者日償賃錢而

富者白享厚利遂監樓店務吏取索自來納錢底籍
及所管等則並無稽考不得已行下諸廂抄具及會
紹興府例給由發下府西甬東兩廂挨究總計二萬
四千四百六十四丈六尺一分四釐比紹興經界實
虧五千四百六十五丈六尺四寸八分六釐然紹興
經界初不具府西甬東二廂也今除府西甬東所得
之數比紹興經界實虧一萬三千二百十七丈一尺
二寸九分六釐形勢之家隱瞞胥吏相為茫匿百年

之間虧折如許方欲行之見底則謗議所積如山經
曰普天之下莫非王土又曰有土此有財有財此有
用既居王土必輸王賦此法也亦理也為有司者不
過奉法循理而已今天下州郡王土有二一曰稅地
稅地有和買役錢有本色折變有科敷差役一曰樓
店務地並不輸納諸色官物亦無差科敷役等事止
納一項官地錢而已比之稅地實為優輕若又隱匿
規避則不復有人心矣大使丞相深燭其姦復寬其

事大要欲使人知居王土則當輸王賦非藉是以圖增衍也今據抄到地數較之紹興年間虧折甚矣姑以鄰郡等則給由輸租每年共得錢一萬三千七百三十八貫九百一十一文元係省錢續準鈞判節文竊恐人戶欺官匿賦之久不以本府為奉法循理而以為加賦苛征特從優卹自上等以至末等其合納官省錢並與作十八界輸官以宜會而代輸見錢公之仁心仁聞至矣民始信公非欲增課羨直欲正紀

綱耳見錢折納官會於官實虧十二萬二百一十五貫四百九文十七界今具地段錢數于后

東南廂

總地三千五十三丈五尺六寸六分

年納官錢一千九百四貫六百八十五文十八

界

東北廂

總地六千一百八十丈四尺六寸三分

年納官錢三千九百七十八貫三百九十三文

十八界

西南廂

總地三千七百二十七丈九尺七寸三分

年納官錢二千五百二十二貫八百九十九文

十八界

西北廂

總地三千七百五十一丈一尺一寸八分四釐

年納官錢二千二百六十二貫八百八十文十八界

府西廂

總地二千六百六十五丈四尺二寸三分

年納官錢一千五十五貫九百五十四文十八界

甬東廂

總地五千八十六丈五寸八分

年納官錢二千十四貫一百文十八界

府倉斗斛

按周禮稟氏為量必先改煎金錫不耗然後權之準之
量之以為黼鄭康成註謂四升曰豆四豆曰區四區
曰黼黼六斗四升也鄭蓋祖晏子論陳氏豆區釜鍾
之說耳至班孟堅始有十龠為合十合為升十斗為
斛然則斛即黼也一謂六斗四升一謂十斗或者今
世所謂省斗足斗之異歟然嘉量之銘曰時文思索
允臻其極蓋謂為民立法者作此以至於道之中也

後世所在郡國取盈斛面雖曰聽民自槩而加耗之
數率是斗級黷弄手法以求羨餘嘉量之意不復有
存矣大使丞相吳公平昔踐履大學絜矩均齊平一
之義嚴揭榜示悉蠲倉教苛取之弊不仰出剩不許
兜撮如罰籌加點舊例一切禁截因舊斛脫壞不可
用俾都吏攬戶軍頭同共監造新斛缺隻一依文
思舊製且令人戶自行槩盪斗級等不得高下其手
至如職田一項於晚增米內每碩蠲減一斗仍更不

別添下數抹單錢九百文亦與除減四百此則寶祐四年十月之榜也

蠲放官賦

按四明志曰正稅曰和買曰折帛曰折麥折鹽實催絹四萬四千三百七十九匹紬五千六百五十九匹綿七萬六千六百九十三兩各有奇曰苗米曰折糯曰折鹽實催九萬八千餘碩先是郡計不贍莫有寬之一分者大使丞相吳公建閫於寶祐四年之九月吏

以元年後八料稅色呈催公曰嘻豈以是朘吾民也哉乃首蠲鄞定象奉慈五縣元年二料二年夏料共五十八萬七千七百三十二貫四百八十文明年以季商肆眚有日除二年秋料三年折帛已陸續放免又先期住催六縣三年夏秋綿絹役錢苗米湖田職田諸色價錢共四十萬九千六百七十六貫五百一十二文九月以本任趙剩到一百四十七萬三千八百五十五貫文為六縣官民預期代輸六年折帛明

年復住催五縣四年二稅等錢二十四萬六千六百八十四貫四百一十九文開慶元年四縣欠五年夏稅錢八萬五千七百八十二貫九百四十四文並從倚閣蓋自公來鎮于鄞弛以予民者無虛歲家至戶到靡不被其澤益之彖曰損上益下民說無疆具公有焉奏上璽書褒嘉恭錄于左

寶祐四年九月十二日住催元年夏秋二料二年

夏料

鄞縣三十二萬八千二百三十三貫一百八十

四文

元年一十七萬一千九百一十貫四百七十

七文

二年一十五萬六千三百二十二貫七百七

文

定海縣六萬五千五百九十五貫三十文

元年一萬六千八百九十七貫五百六文

二年四萬八千六百九十七貫五百二十五

文

象山縣五萬三百一十貫七百五十二文

元年一萬七千五百三十三貫二十五文

二年二萬二千七百七十七貫七百二十八文

奉化縣六萬九千六百四十八貫五百七十三文

元年一萬九千一百五十五貫六百五十六文

二年五萬四百九十二貫九百一十七文

慈溪縣七萬三千九百四十四貫九百四十二文
元年二萬八千八百八十二貫四百四十四文
二年四萬五千六百二貫四百九十八文

寶祐五年七月十二日於明堂赦前兩月先住催
三年夏秋綿絹役錢苗米湖田職田等錢

鄞縣一十八萬八千六百八十九貫一百一十
二文

定海縣七萬一千四十七貫一百三十八文

象山縣一萬九千二百四貫二百四十五文

奉化縣五萬三千六百三十三貫六百一十五文

慈溪縣七萬七千八十二貫四百二文

昌國縣二十貫文

寶祐五年九月十五日將本任內趲到錢代為人戶

積納六年折帛

鄞縣六萬二千二百九十九貫文

定海縣二萬六千一百三貫五百文

奉化縣四萬二千二百三十五貫三百文

慈溪縣二萬九千九百三十五文

象山縣七千九百七十八貫八百文

昌國縣一千一百七十八貫四百文

寶祐六年五月十日住催四年夏秋綿絹折帛苗米

湖田職田折價等錢

鄞縣一十三萬一千四十四貫六百三千四文

定海縣四萬五千一百九十九貫四文

象山縣七千二百二十三貫七百三十一文

奉化縣二萬六千九百九十四貫七百文

慈溪縣三萬六千二百二十三貫四十三文

開慶元年四月五日住催五年夏秋綿絹苗米湖田

職田折價等錢

鄞縣六萬五千一百四十八貫一百四十六文

定海縣八千七百八十八貫七百七十四文

慈溪縣九千三貫四百四十五文

象山縣二千一百四十二貫五百七十九文

奏狀

證對臣一介庸陋夙誤東知自館職而至宰輔爾來三十餘年矣惟其事陛下最久故熟知陛下德意志慮念念在民是以臣屢分藩閫所至必以撫摩培植為第一義無非推陛下之德意志慮而致之民也歲晏力疲復被親擢俾牧東藩感畏恩威罔敢辭避領郡之初即將寶祐元年二年四年四料苗稅及三年折

帛錢並與倚閣近又於明禋三月之前將三年苗稅
悉行蠲放以至存養鰥寡孤獨扶持無告窮困亦曰
不負所學以不負陛下而已然州縣之弊日深吏胥
攬戶之姦滋熾前後所弛征賦雖幾六百萬猶恐在
猾吏頑攬之家者多而及民者少若非將向去未起
催官物預行寬恤則實惠豈能周徧田里臣祇役踰
年苦身節用幸有餘積契勘所管六縣折帛錢一項
以寶祐三年催到數目計之見錢十八界會子各計

七萬八千六百單五貫六十文共細計十七界一百四十七萬三千八百五十五貫文臣見將本任內趲到錢物撥出上項錢今椿庫眼代為六縣百姓輸納寶祐六年折帛錢一項庶幾少副聖主惠養黎元之意而臣亦粗逃芻牧之責除已鏤榜下六縣曉示人戶外謹錄奏聞伏候勅旨

褒詔

粵從分牧恪奉寬條既屢蠲往歲之逋租復代納來年

之常賦廉然後能無取公爾可見忘私良用歎嘉所請
宜允

四明續志卷七

欽定四庫全書

四明續志卷八

宋梅應發劉錫同撰

蠲放砂岸

砂岸者瀕海細民業漁之地也浦嶼窮民無常產操網
畧資以卒歲巨室輸租于官則即其地龍斷而征之
或興或廢寶祐四年秋大使丞相吳公之開閭也人
謂砂岸廢而民無統寇職以肆公因民之欲而奏復

之越一年人又謂主砂者苛征而相吞噬者則滋訟
公知其擾民也亟奏寢之或止或行悉因民欲民亦
知公之心無他也舊所收砂租錢初以供郡庠養士
貼厨水軍將佐供給新創諸屯及出海巡遑探望把
港軍士生券本府六局衙番鹽菜錢之費今砂租既
蠲則以興復翁山十五酒坊所收息錢補之

乞蠲砂租奏請

前歲之秋冒膺瀛閩上事之日適當海寇披猖之餘

遂行攷究本末多謂因沿海砂岸之罷海民無大家
以為之據依因澥浦胡家渡稅場之罷盜賊無官司
以為纂節奪攘矯虔因得自恣臣遂具奏聞乞行興
復就以砂岸稅場所入歲計二十二萬九千六十五
貫八百單五文為慶元府幫支郡庠養士厨食錢十
三萬六千二百貫文為定海帳前水軍幫支久閣制
領將佐每歲供給錢九萬二千五百貫為定海水軍
創支駕船出海巡連探望把港軍士生券錢四萬一

千貫文為慶元府六局衙番幫支久閣每歲鹽菜錢
一萬五千貫文為慈溪縣管一新創夜飛山防遏寇
盜屯戍水軍歲支錢米五萬六千六百貫文為象山
縣管一邊海陳山東宿渡新創軍船載渡民旅防遏
寇盜水軍歲支錢米二萬一千一百二十貫文為定
海縣管下新創浹港防遏寇盜屯戍水軍歲支錢米
六千二百八十貫文已上共計三十六萬八千七百
貫文前所謂砂岸稅場之入不足以當其半則以慶

元府經常錢補之亦既踰年于此矣但臣始者之興復砂岸稅場不過欲為清海道絕寇攘之計今已將應千砂岸諸舉並行團結具有規繩本土之盜不可藏往來之盜則可捕又浹港既有戍卒則胡家渡澥浦一帶不至空曠防閑備禦粗為周密於是昨來興復砂岸稅場所入之課利仍可盡弛以予民矣但前來養士餉軍之費一孔以上皆不可闕則臣見照常平條法召募土着上戶措置係額坊翁山等十五所歲

入二十八萬四千貫文又措置慈溪縣係省官酒務
歲收息錢七萬三千貫文總兩項為錢三十五萬七
千貫文以抵前諸項之費尚欠一萬一千七百貫文
則就本府醕酒庫息錢內支撥庶幾利之弛於民者
可以徧及海陬而養士餉軍之需又不至於違誤而
為慶元一郡經久之計臣除已一面備牒將砂岸及
胡家渡澥浦稅務照端平淳祐年間已降指揮並行
住罷仍割慶元府將翁山等坊慈溪酒務每歲息錢

專充前項養士餉軍經常支遣外欲望聖慈降付尚書省給降省劄付本司慶元府逐一遵守施行不許違戾謹錄奏聞伏候勅旨右劄送沿海制置大使司照應寶祐六年五月空日

榜

當使前歲領郡之初人或謂近年海寇披猖如三山小榭等處有登岸焚劫之事皆起於罷砂岸而砂民無所統率之故遂具申奏及行興復既復之後雖藉所

收錢物以助養士恤軍等費然或又謂大家上戶不能不因此培克沿海細民又且詞訴迭興更相吞併殊失本司興復之初意又胡家渡澥浦二稅場人亦謂住罷之後官司更無纂節因此數十里之內莽為盜賊出沒之區亦遂具申奏乞行興復繼而議者又謂於公家利益甚少而稅場為民害者不貲徐而察訪言亦非虛當使於是復思變通之術將見措置翁山十五坊及慈溪縣酒務歲收息錢抵偃所收砂岸錢

及胡家渡澥浦兩稅場之入又將砂岸諸舉差官團
結使本境之盜無所容外境之盜不可入則前所謂
砂岸無所統率而盜賊縱橫之事不必慮矣又於浹
港置立小屯則前所謂數十里之內官司並無纂節
而莽為盜賊出沒之區者不必慮矣遂行具奏乞將
砂岸兩稅場仍舊住罷庶幾除害而弛利可以為此
郡悠久之計今春筭夏網已行了畢砂岸之家已收
一年之利住罷正當其時其詳備載之省符但歲支

養士及諸屯券食并將校添給兵番鹽菜等錢計三十六萬八千七百貫文一孔以上不可違欠全藉翁山十五坊及慈溪酒務所入制司所當常加意點檢使所入常足以支所出方無闕誤案備榜府前市曹有砂岸縣分及翁山諸坊慈溪縣酒務張挂曉示

蠲免抽博倭金

收養飄泛倭人麗人附

倭人冒鯨波之險舳艫相銜以其物來售市舶務實司之然藉抽博之入以裨國計硫黃板木而已金非所

利也倭金懷袖所攜銖兩幾何而官吏之虐取牙儻
之控扼卒使之乾沒焉非朝廷懷遠意大使丞相吳
公力陳于上請弛其禁勿征願代輸之上可其奏取
歲額之酌中者為準制司歲抱解三萬六百五十六
貫文於歲收市舶司回稅錢內支撥就牒赴市舶司
交管起發自寶祐六年始公又念倭人之流離於海
上者多阻飢併請就本司人各日給米二升舶司日
支錢一貫五百文候次年歸國日止朝廷從之世未

必有知公用意之深者

奏狀

臣竊見朝廷行下仍放倭商赴市舶務抽博深得時措之宜但有一事於朝廷歲不過捐十七界一萬餘緡之楮而可以深得遠人之心者不敢不以上聞照得倭商每歲大項博易惟是倭板硫黃頗為國計之助外此則有倭金商人攜帶各不能數兩未免深藏密匿求售於人蓋其所販倭板硫黃之屬多其國主貴

臣之物獨此乃倭商自己之物殊為可念緣船司例合抽解多為此間牙人啗誘謂官司有厲禁常為汝密行貨賣遠人不察其偽多以付之姦牙輒為所匿且脅以本朝法令之嚴倭商竟不敢吐氣常懷憾而去臣叩之船務四年博買之利所收止八千餘緡五年博買之利所收止一萬餘緡朝廷以萬餘緡十七界之利而失遠人向化之心必有所不肯特前後官司未有以上達者爾臣除已關報市舶司今次倭船

到岸免抽博金子如歲額不可闕則當以最高年分所抽博之數本司代為償納伏望聖慈即賜睿旨行下舶務免將倭商金子抽博施行所損無毫釐而所益何翅丘山伏候勅旨

申狀

本司照得每歲舶務抽博倭金之利多者不過二三萬緡舊楮而羅織漏舶之金極不過十數兩惟寶祐五年分前官葉檢閱體國生財之意太重比之常年檢

察倭商漏舶之金為數獨多遂有六萬七千二百餘貫無藝之入然在朝廷何翅萬牛之一毛而使倭人怨之麗人傳之其在四方承平之時尚可其在海道多虞之時則斷斷乎其不可也欲望朝廷特賜詳察拖照前申罷倭人抽博之微息弛倭人漏舶之厲禁以示朝廷懷遠之恩其所關繫實為不細仍乞速賜行下舶務及本司照應如朝廷未以為然即乞就其中擇抽剝利息最高年分容本司抱解施行伏候指

揮

再申

照對本司近具奏申乞將倭人之偶為風水飄流者本
司日給白米二升市船司日給十七界一貫五百文
候次年歸國日住支已蒙朝廷從申劄下又一項乞
免將倭金抽博以寬其一線營生之路以免其數十
年為官吏牙僧欺騙之害朝廷歲失課利不過十七
界一二萬緡而可以收遠人之心未準朝廷竟行從

申潛實非好異以損舶司課利蓋緣倭與高麗為鄰
已服屬於韃靼萬一彼生姦狡謀我者無所不至風
聲扇誘轉而至於倭則中國之憂實未可量所以小
小羈縻微微存恤使知朝廷之仁心仁聞則遠人愈
將向慕中國此正潛區區之微機也今準省劄備坐
提領所申每歲抽博倭金數目大率增擡且以舶務
每歲官吏牙儈羅織倭人指為漏舶白行罰納之金
袞為歲課此正失倭人心之大者官吏不知大體積

以為能特未有以告之朝廷者潛忝預舊弼况當海道警備之時而隱情不言其罪大矣况每歲正抽博之金實不過一二萬緡課利而所謂騙取漏舶之金亦極不滿一二萬緡此何止千萬牛之一毛哉謹別具狀開申欲望朝廷詳察事體亟賜行下本務免行抽博永以為例庶幾海道密享懷遠之益忱非小補

省咨

市舶所申準都省送下沿海制置大使司申

云

奉鈞

判送所區處申本所契勘各年抽博漏船實解到金
分兩價直并抽博淨息錢數本所主管文字趙與毗
擬照得慶元船司每歲所收倭金除漏船外抽博之
數固自不多吳觀文申乞免抽博就其中擇抽博年
分抱解欲照所申具申朝廷乞劄下制司每歲倭船
到船照酌中年分寶祐五年抽博息錢從本司抱解
三萬六百五十六貫十七界令項解發施行劄送沿
海制置大使司從市舶所點對事理施行

收養麗人

公既請于朝收養倭人之流離者矣寶祐六年十一月水軍申石衙山有麗船一隻麗人六名飄流海岸公命帳前將校取之來詰其所以張小斤三則麗之李樞密藏用家奴也金光正金安成金萬甫盧善才則麗之萬戶土軍也金惠和則麗之還俗僧也各因本國遷發把隘駕船往白陵縣收買木植是年十月十三日在海遭風不知所向飄流至石衙山具言自癸

已歲麗主避敵徙居海島之江華縣島濶三百餘里
其去陸岸之程亦三百里僅存南計北計十七州敵
歲一哨則事之以寶貨間遣使至新都延之承天館
饋遺豐甚自戊申後敵使不屑渡海麗主躬帥其屬
往承天府禮逆之祈免侵掠彼必欲麗主復歸舊都
此懼其給已卒不從敵於是連年圍海岸逼新都境
土就荒米價翔踴銀瓶一斤易粟三石準中國一碩民殍
死者衆敵退麗人始還舊巢採粟以充飢取松實以

售商賈有崔令公世積金穀今年四月八日令公出
禮佛麗主遣人乘間誅之盡發所藏賑軍民國粗定
又言有向上頭目人洪服良因在邊皆麗歸敵今麗
有貢必遣往服良所因以轉致于敵自江華至服良
所約七日自服良所至敵遠近則不可知也麗有三
窟曰早窟曰山水窟曰袈裟窟俱為敵蹂躪兵弱晝
不敢與敵戰夜僅能偷劫勢終弗支今兵船之在海
岸者號三十九領領二隻又都兵馬大船十二隻大

船面濶三丈長亦如之狀如箕織席為帆便於正順風而已公以其事上聞且從本司日支六名米各二升錢各一貫及歸國則又給回程錢六百貫米一十二碩公於懷遠禦外周且密矣

收刺麗國送還人

開慶元年四月綱首范彥華至自高麗賫其國禮賓省牒發遣被擄人升甫馬兒智就三名回國制司引問馬兒者年二十六揚州灣頭岸北裏解三也十二歲

隨父業農秋時為蒙古掠去部長孟克叔楊珠濟達大王所撥隸呼爾哈部下牧馬剝作三搭髮取名馬兒年十五時又見兵至一人即今升甫也升甫年二十四本姓馮名時臨安府人生七歲父以莊田在淮安州鹽城往居焉淳祐九年為兵所掠亦隸呼爾哈智就者年三十八德安府人黃二也家市縑帛有莊在城外之西羅村十四歲金國投拜人楊太尉仕于德安陰結李全妻小姐姐貳于金以叛黃遂為兵所虜金

主第三兄使往沙沱河牧羊凡三年異州種田凡十二年咸平府運糧凡六年寶祐五年七月頭目人奇嚕達領貳萬人出軍馮時解三皆以牧馬從凡兩月至麗界首東路屯于和尚城麗師不出及十一月久雨馬多凍死人且餒馮解謀逸歸本朝匿深山中師退麗人取以歸寘島上六年正月入麗京拜國主月給米養之旬餘黃二亦至皆在漢語都監所宿食三月發入范彥華船又逾年三月船始歸制司即備申

朝廷以各人本貫並無親屬欲收刺廂軍續準省劄從所申收刺解三取名解福馮時取名馮德黃二取名黃恩並收刺崇節指揮專充看養省馬著役

麗國牒

附見
于後

高麗國禮賓省牒上大宋國慶元府當省準貴國人升甫馬兒智就等三人久被北人捉拏越前年正月分逃閃入來勤加館養今於綱首范彥華俞昶等合網船放洋還國仍給程糧三碩付與送還請照悉具如前事須牒大宋國慶元府照會施行謹牒已未三月日謹牒

注簿文林郎金之用

注簿文林郎李孝悌 丞文林郎金光遠 丞文林郎潘吉儒 試少卿入內侍文林郎李軾 卿

朝識大夫任柱 判事入內侍通議大夫三司使
太子右庶子羅國維 判事正議大夫監門衛攝

上將軍
奉君用

賑濟

富韓公鎮青州廩民之老弱病瘠者活五十餘萬人
到于今稱之大使丞相以韓公之心為心凡鰥寡孤
獨困窮賑貸無倦色寶祐四年九月至鎮十月濟一
萬七千六百九口支錢四萬七千五百四十五貫米
一千四百九十八碩八斗五年十二月濟二萬三十

四口支錢三萬四千二百六十二貫文米一千七百一十三碩一斛六年二月濟糶一萬七千六百五十口支米二千二百一十三碩開慶元年四月濟二萬四百三十九口支錢七萬二千五百五十八貫文米一千六百五十九碩九斛公有實德于鄞歌之者曰膏雨吾土襦袴吾人其惟吳公乎

寶祐四年十月濟惠字號人戶

東南廂

大人二千五百八十一口每口錢三貫文米一

斛

小兒一千二百四十口每口錢二貫文米五升

東北廂

大人二千九十一口每口錢三貫文米一斛

小兒八百二十一口每口錢二貫文米五升

西南廂

大人三千三百一十三口每口錢三貫文米一

斛

小兒一千五百一十八口每口錢二貫文米五

升

西北廂

大人三千一百三十七口每口錢三貫文米一

斛

小兒一千一百七口每口錢二貫文米五升

甬東廂

大人五百六十二口每口錢三貫文米一斛
小兒二百五十八口每口錢二貫文米五升

府西廂

大人六百四十三口每口錢三貫文米一斛
小兒三百三十八口每口錢二貫文米五升

寶祐五年十二月濟惠字號人戶

東南廂

大人二千四百八口每口錢二貫文米一斛

小兒一千二百七口每口錢一貫文米五升

東北廂

大人一千三百四十六口每口錢二貫文米一

斛

小兒一千二十八口每口錢一貫文米五升

西南廂

大人三千九百六十六口每口錢二貫文米一

斛

小兒二千二十九口每口錢一貫文米五升

西北廂

大人二千七百三十三口每口錢二貫文米一

斛

小兒四百七十六口每口錢一貫文米五升

甬東廂

大人二千一百七十八口每口錢二貫文米一

斛

小兒七百四十口每口錢一貫文米五升

府西廂

大人五百九十七口每口錢二貫文米一斛

小兒三百二十六口每口錢一貫文米五升

寶祐六年二月濟糶敏字號人戶

東南廂

大人一千五百二十九口每口米二斛

小兒六百三十口每口米一斛

東北廂

大人一千八百九十三口每口米二斛

小兒七百二十八口每口米一斛

西南廂

大人二千二百六十七口每口米二斛

小兒一千四口每口米一斛

西北廂

大人一千七十二口每口米二斛

小兒三百五十六口每口米一斛

甬東廂

大人四千七十三口每口米二斛

小兒一千四百六十四口每口米一斛

府西廂

大人一千六百八十六口每口米二斛

小兒九百四十九口每口米一斛

開慶元年四月濟惠字號人戶

東南廂

大人二千二百六十口每口錢四貫文米一斛
小兒一千二百二十五口每口錢三貫文米五

升

東北廂

大人二千三百口每口錢四貫文米一斛
小兒一千二十八口每口錢三貫文米五升

西南廂

大人四千九十七口每口錢四貫文米一斛

小兒一千九百二口每口錢三貫文米五升

西北廂

大人三千二百三十二口每口錢四貫文米一

斛

小兒九百七十七口每口錢三貫文米五升

甬東廂

大人九百七十八口每口錢四貫文米一斛

小兒五百三十八口每口錢三貫文米五升

府西廂

大人六百四十四口每口錢四貫文米一斛

小兒四百八十九口每口錢三貫文米五升

祈禱

龍見附

寶祐五年夏六月不雨大使丞相焦勞請禱靡所不至
迺延廣仁院白衣大士若靈應廟神祠山城隍諸像
列公堂而祈焉一日亭午驕陽如焚公方露香禱于

庭俄密雲起南方有黑龍見蜿蜒飛動萬目駭視雨
隨下如注四郊霑足歲事獨稔於旁郡六年三月種
未入土彌月旱亢人情皇皇公齊心禱祈如前望日
迎天井山蜥蜴神雖間霖霖卒未大應公謂民命近
止雨少緩則不及事即齊宿真隱觀設碧玉醺以告
于帝時夜半焚章雷雨沛然徹旦未休黎明公還府
夾道呼相公雨歡聲如雷河流洋溢農皆荷鍤乃亦
有秋民不乏絕者公之力也開慶元年五月苦淫潦


不止低田凡三蒔秧淹沒而偃民搏手無策禱禳無
所不用其極公曰虛文非所以格天也乃命僚佐決
府縣三獄訟出繫囚盡蠲五年以上苗稅減放諸酒
庫一分息著為額令下百姓鼓舞陰雲解駁天日清
明公又慮積水之害禾也委官周行田野徧啟諸閘
有礙堰所不能泄者則決之水既疏苗之仆者興焉
越兩月雨復愆期公禱輒霽歲卒大熟蓋三年之間
常暘苦雨無歲無之公一忱所格如響斯應民雖至

迫切亦恃公以無恐公詩有云數莖半黑半絲髮一片憂晴憂雨心念慮未嘗不在畎畝間也傳曰閔雨者有志乎民者也喜雨者有志乎民者也其公之謂乎天井山蜥蜴神公為請于朝元年七月已侯封者加二字未封者悉侯之蓋以旌龍見之靈云

瑞麥

淳熙三年皇子魏王判明州時象山縣麥穗兩岐王聞于上刻石鄮山堂可攷大使吳公以舊弼判慶元府

開慶改元四月奉化縣聖姑亭山產三穗麥眎昔過
之異瑞休祥驚耀羣目意者視飢由已天以是答今
之后稷歟公雖偃藩每以四方水旱盜賊為隱憂不
言祥瑞蓋古大臣用心云



四明續志卷八